



ҚАЗАҚСТАН РЕСПУБЛИКАСЫНЫҢ
ҰЛТТЫҚ БАНКІ
№ 79 Б А С П А С Ө З Р Е Л И З І
2014 жылғы 24 қазан

Қаржы нарығындағы ахуал туралы

1. Инфляция

Қазақстан Республикасының Ұлттық экономика министрлігі Статистика комитетінің ресми деректері бойынша 2014 жылғы қыркүйекте инфляция 0,5%-ды (2013 жылғы қыркүйекте – 0,2%) құрады. Бұл ретте азық-түлік тауарларының бағасы 0,3%-ға (0,2%-ға төмендеді), азық-түлікке жатпайтын тауарлар 0,5%-ға (0,2%-ға) көтерілді. Ақылы қызмет көрсету тарифтері 0,7%-ға (0,6%-ға) өсті.

Азық-түлік тауарлары нарығында 2014 жылғы қыркүйекте көп дәрежеде күріш – 3,1%-ға, ұн – 2,0%-ға, ет және ет өнімдері – 1,1%-ға, оның ішінде құс еті – 4,4%-ға, сүт өнімдері – 0,9%-ға, балық және теңіз өнімдері – 0,8%-ға, нан – 0,8%-ға, макарон өнімдері – 0,7%-ға қымбаттады. Жемістер мен көкөністердің бағасы – 3,9%-ға, оның ішінде сәбіз – 16,4%-ға, пияз – 14,1%-ға, картоп – 10,7%-ға, сондай-ақ қант – 1,1%-ға төмендеді.


Азық-түлікке жатпайтын тауарлар тобында сыртқы киімнің бағасы 0,8%-ға, аяқ киім – 0,5%-ға, тұрмыстық үй заттары – 0,5%-ға, дәрі-дәрмектер – 0,6%-ға өсті. Бензиннің құны 0,3%-ға өсті, дизель отынының құны өзгерген жоқ.

Ақылы қызмет көрсету тобында тұрғын үй-коммуналдық саладағы қызметке ақы төлеу 0,3%-ға өсті. Бұл ретте қоқыс жинағаны үшін тарифтер 0,8%-ға, ыстық су – 0,6%-ға, тұрғын үйді жалға алу – 0,8%-ға, суық су – 0,2%-ға, орталық жылыту – 0,1%-ға өсті. Бұдан басқа, өткен айда амбулаторлық қызмет көрсету бағасы 1,4%-ға, білім беру қызметі – 2,4%-ға, көлік қызметі – 1,4%-ға, демалыс, ойын-сауық және мәдениет саласындағы қызмет – 1,4%-ға, мейрамханалар мен қонақүйлер қызметі – 0,6%-ға көтерілді.

2014 жылғы қаңтар-қыркүйекте инфляция 5,9% (2013 жылғы қаңтар-қыркүйекте – 3,3%) болды. Азық-түлік тауарлары 2014 жылдың басынан бері 5,6%-ға (1,6%-ға), азық-түлікке жатпайтын тауарлар – 6,7%-ға (1,8%-ға), ақылы қызмет көрсету – 5,4%-ға (6,9%-ға) қымбаттады (1-график).

1-график

2013 және 2014 жж. қаңтар-қыркүйектегі инфляция және оның негізгі топтары



2014 жылғы қыркүйекте инфляция жылдық көрсеткіш бойынша 7,4% (2013 жылғы желтоқсанда – 4,8%) болды. Азық-түлік тауарлары соңғы 12 айда 7,4%-ға (3,3%-ға), азық-түлікке жатпайтын тауарлар – 8,4%-ға (3,3%-ға), ақылы қызмет көрсету – 6,5%-ға (8,0%-ға) қымбаттады.

2. Төлем балансы және сыртқы борыш

2014 жылғы 1-жартыжылдықтың нәтижелері бойынша ағымдағы операциялар шотының профициті 2013 жылғы 1-жартыжылдықтағы 3,3 млрд. АҚШ долларымен салыстырғанда 6,6 млрд. АҚШ доллары болды. Бұл ретте 2014 жылғы 2-тоқсанда ағымдағы шоттың оң сальдосы 0,4 млрд. АҚШ доллары болды.

2014 жылғы 1-жартыжылдықта ағымдағы операциялар шотының жақсаруы 2013 жылғы 1-жартыжылдықпен салыстырғанда сауда балансы профицитінің 22,6 млрд. АҚШ долларына дейін 17,4%-ға ұлғаюы есебінен болды. Тауарлар экспорты 42,2 млрд. АҚШ долларына дейін 2,1%-ға аздап төмендегенде, тауарлар импорты 19,6 млрд. АҚШ долларына дейін 17,8%-ға қысқарды.

Тауарлардың ресми экспорты 41,8 млрд. АҚШ долларына дейін 2,0%-ға азайды, оның ішінде 29,9 млрд. АҚШ доллары (немесе 71,5%) мұнай және газ конденсатының экспортына тиесілі. Brent сұрыпты мұнайдың әлемдік бағаларының орташа деңгейі 2014 жылғы 1-жартыжылдықта бір баррель үшін 108,8 АҚШ долларын құрады, бұл оның 2013 жылғы 1-жартыжылдықтағы деңгейінен шамалы асады (бір баррель үшін 108,0 АҚШ доллары). Негізгі тауар номенклатурасының құрылымында нақты жеткізулердің және сол сияқты келісімшарттық бағалардың төмендеуі есебінен болған түсті металдар экспортының 39,1%-ға, сондай-ақ келісімшарттық бағалардың қысқаруымен қамтамасыз етілген болған қара металдар экспорты құнының 1,8%-ға азаюы тіркелді. Минералдық өнімдер экспорты нақты жеткізулер 3,3%-ға өскен кезде 1,3%-ға ұлғайды.

2014 жылғы 1-жартыжылдықта ресми сауда статистиканың деректері бойынша тауарлар импорты 15,5%-ға төмендеді және 19,1 млрд. АҚШ долларын құрады. Инвестициялық тауарлар импортының төмендеуі (жиынтық импорттағы үлесі 37,0% немесе 7,1 млрд. АҚШ долл.) 18,1%-ды құрады. Аралық өнеркәсіптік тұтыну тауарлары бойынша ресми импорт құнының 5,8 млрд. АҚШ долларына дейін 26,3%-ға барынша азаюы тіркелді. Тұтынушылық тауарлардың жиынтық импорты өзгермеді деуге болады, бұл ретте азық-түлік тауарларын әкелу 1,8 млрд. АҚШ долларына дейін 6,9%-ға қысқарды, ал азық-түлікке жатпайтын тауарларды әкелу, керісінше, 2,5%-ға ұлғайып, 4,0 млрд. АҚШ долларын құрады.

Бастапқы кірістердің 12,2 млрд. АҚШ долларын құраған теріс сальдосы 2013 жылғы 1-жартыжылдықтағы деңгейге жуық қалыптасты. Бұл ретте тікелей инвестициялардан резидент еместерге кірістер төлеу 10,9 млрд. АҚШ долларына дейін 2,6%-ға қысқарды.

Ағымдағы шоттың басқа құрамдас бөліктері бойынша халықаралық қызмет көрсетулер мен қайталама кірістердің теріс дисбаланстары тиісінше 3,0 млрд. АҚШ долларын және 0,8 млрд. АҚШ долларын құрады.

Қаржы шоты (Ұлттық Банктің резервтік активтерін есептемегенде) 2014 жылғы 1-жартыжылдықта 1,1 млрд. АҚШ долларына тең теріс сальдомен қалыптасты (2013 жылғы 1-жартыжылдықта 1,2 млрд. АҚШ доллары). Сонымен қатар қаржылық операциялар бойынша капиталдың таза әкелінуі немесе «қалған елдерден таза қарыз алу» қалыптасты¹.

Шетелдік тікелей инвестициялар бойынша 4,4 млрд. АҚШ долларына тең теріс баланс қалыптасты. Тікелей инвестициялау операциялары бойынша қаржы активтерінің таза қысқаруы 0,6 млрд. АҚШ долларын құрады (2013 жылғы 1-жартыжылдықта оң

¹ Төлем балансының жаңа әдіснамасына сәйкес қаржы шотының және оның құрамдас бөліктері сальдосының теріс белгісі таза қарыз алудың (міндеттемелердің активтерден басым өсуі) халықаралық инвестициялық позицияның нашарлауына және елдің таза сыртқы борышының өсуіне ықпал ететінін көрсетеді

сальдо 1,4 млрд. АҚШ доллары). Шетелдік тікелей инвестициялар бойынша міндеттемелердің таза өсуі 3,9 млрд. АҚШ долларын құрады.

Шетелдік тікелей инвестициялардың «салымдар бағыттары» қағидаты бойынша есепке алынған жалпы әкелінуі 2014 жылғы 1-жартыжылдықта 2013 жылғы 1-жартыжылдықтағы деңгейге жуық қалыптасты және 12,4 млрд. АҚШ долларын құрады. Өзара фирмааралық міндеттемелер бойынша негізгі борышты өтеуді ескергенде, Қазақстанға тікелей инвестициялардың таза әкелінуі 5,3 млрд. АҚШ долларын, ал шетелге таза әкетілуі 0,8 млрд. АҚШ долларын құрады.

Портфельдік инвестициялар 4,6 млрд. АҚШ долларына тең (2013 жылғы 1-жартыжылдықта 1,1 млрд. АҚШ доллары) оң сальдомен қалыптасты. Активтерді 6,6 млрд. АҚШ доллары сомада таза сатып алу (ұлғаю) Ұлттық қордың шетелдік активтерінің 7,2 млрд. АҚШ долларына өсуі есебінен қамтамасыз етілді.

Портфельдік инвестициялар бойынша міндеттемелерді таза қабылдау 2,0 млрд. АҚШ долларына тең оң сальдомен қалыптасты, бұл 2014 жылғы 2-тоқсанда шетелдік нарықтарда борыштық бағалы қағаздар шығару және эмитентті ауыстыру бойынша 2,6 млрд. АҚШ долларындағы жалпы сомадағы банктік емес ұйымдардың операцияларымен қамтамасыз етілді. Резидент еместердің қолындағы бағалы қағаздарды өтеу 0,5 млрд. АҚШ долларын құрады.

Басқа инвестициялар бойынша 1,3 млрд. АҚШ долларындағы теріс баланс тіркелді (2013 жылғы 1-жартыжылдықта 2,0 млрд. АҚШ долларындағы оң баланс).

2014 жылғы 30 маусымда Қазақстан Республикасының сыртқы борышы 155,5 млрд. АҚШ долларын құрады, оның 4%-ы немесе 5,8 млрд. АҚШ доллары мемлекеттік сектордың², 7%-ы немесе 10,6 млрд. АҚШ доллары «Банктер»³ секторының сыртқы борышына, 41%-ы немесе 64,7 млрд. АҚШ доллары «Басқа секторлардың»⁴ үлестес емес резидент еместер алдындағы берешегіне тиесілі, ал қалған 48%-ын немесе 74,5 млрд. АҚШ долларын осы сектордың фирмааралық берешегі құрайды.

2014 жылғы 2-тоқсанда сыртқы борыш, негізінен, «Басқа секторлардың» үлестес емес резидент еместер алдындағы сыртқы берешегінің өсуі есебінен 4,1 млрд. АҚШ долларына ұлғайды. Мемлекеттік сектордың сыртқы борышы 92,7 млн. АҚШ долларына қысқарды, фирмааралық берешек 31,1 млн. АҚШ долларына азайды, ал банктердің борышы 108,1 млн. АҚШ долларына ұлғайды.

«Басқа секторлардың» сыртқы борышының өсімі, негізінен, қазақстандық эмитенттердің халықаралық капитал нарықтарына белсенді түрде шығуымен байланысты. Мәселен, 2014 жылғы 2-тоқсанда «ҚазАгро» ҰБХ» АҚ осыған дейін тіркелген Облигациялар Шығарылымының Бағдарламасы шеңберінде 600 млн. еуро сомасына еурооблигация шығарылымын орналастырды, сондай-ақ «Қазақстан Темір Жолы» ҰК» АҚ жалпы сомасы 285 млн. швейцар франкіне дебюттік еурооблигацияның екі траншын сәтті орналастырды.

Қазақстандық кәсіпорындардың шетелдік тікелей инвесторлардың алдындағы міндеттемелерінің ұлғаюы 2014 жылғы 2-тоқсанда 1,1 млрд. АҚШ долларын құрады, бұл бұрынғысынша, Қазақстан аумағында жұмыс істеп жатқан шетелдік компаниялар филиалдарының ірі мұнай-газ жобаларын іске асыруымен байланысты. Сонымен қатар, «Жайықмұнай» ЖШС және «Қазақстан Темір Жолы» ҰК» АҚ сияқты резиденттердің олардың резидент емес еншілес ұйымдарының бұрын шығарылған бағалы қағаздары бойынша эмитенттің міндеттерін қабылдауы (яғни, жалпы сомасы 1,5 млрд. АҚШ долларына эмитентті ауыстыру) фирмааралық берешектің жоғарыда көрсетілген қысқаруына ықпал етті. Бір мезгілде эмитентті ауыстыру үлестес емес резидент

² «Мемлекеттік басқару органдарынан» (Қазақстан Республикасының Үкіметі) және «Орталық Банктен» (Қазақстан Республикасының Ұлттық Банкінен) тұрады

³ Екінші деңгейдегі банктерден және «Қазақстанның Даму Банкі» АҚ-тан тұрады

⁴ Банктік емес қаржы корпорацияларынан, қаржылық емес корпорациялардан, сондай-ақ үй шаруашылықтарынан және үй шаруашылықтарына қызмет көрсететін коммерциялық емес ұйымдардан тұрады

еместердің (осы бағалы қағаздарды ұстаушылардың) алдындағы міндеттемелердің тиісінше өсуіне әкелді.

2014 жылғы 30 маусымдағы жағдай бойынша сыртқы борыштың ІЖӨ-ге қатынасы 2014 жылғы 1-тоқсанның соңындағы 65,7%-бен салыстырғанда 67,9%-ды құрады, ал сыртқы борыштың ТҚЭ-ге қатынасы 163,3%-бен салыстырғанда 172,9%-ды құрады, Ұлттық Банктің резервтік активтері өтеудің бастапқы мерзімі бойынша қысқамерзімді сыртқы борыштан 2,5 есе асып кетті.

2014 жылғы 2-тоқсанда сыртқы борыштық міндеттемелердің өсуі еліміздің сыртқы борыштық активтерінің өсуінен шамалы асты және Қазақстанның таза сыртқы борышы 0,5 млрд. АҚШ долларына ұлғайып, есепті кезеңде 16,5 млрд. АҚШ долларын немесе ІЖӨ-нің 7%-ын құрады. Бұл ретте мемлекеттік сектор және «Банктер» секторы, бұрынғысынша, қалған әлемге қатысты таза кредитор позициясын сақтап отыр.

3. Халықаралық резервтер мен ақша агрегаттары

2014 жылғы қыркүйекте Ұлттық Банктің халықаралық резервтері ұлғайды. Ұлттық Банктің жалпы халықаралық резервтері 28,0 млрд. АҚШ долларына дейін 0,8%-ға ұлғайды (жыл басынан бері 13,1%-ға ұлғайды). Ұлттық Банктің таза халықаралық резервтері 0,2%-ға ұлғайып, 27,1 млрд. АҚШ долларын құрады (жыл басынан бері 12,2%-ға өсті). Үкіметтің Ұлттық Банктегі шоттарына валютаның түсуімен және банктердің корреспонденттік шоттарындағы шетел валютасындағы қалдықтарының ұлғаюымен қамтамасыз етілген өсім ішкі валюта нарығында валютаны сатумен, Ұлттық қордың активтерін алтынвалюта резервтерінің шоттарынан толықтыру және Үкіметтің сыртқы борышына қызмет көрсету бойынша операциялармен ішінара өтелді. Нәтижесінде таза валюта қорлары (ЕАВ) 2014 жылғы қыркүйекте 2,2%-ға өсті. Алтындағы активтер жүргізілген операциялар нәтижесінде, оның бағасы 5,9%-ға төмендеген кезде 4,8%-ға төмендеді.

2014 жылғы қыркүйекте жалпы алғанда елдің халықаралық резервтері Ұлттық қордың шетел валютасындағы активтерін қоса алғанда (алдын ала деректер бойынша 76,2 млрд. АҚШ доллары) 104,2 млрд. АҚШ долларына дейін 0,8%-ға төмендеді (жыл басынан бері 9,1% өсті).

2014 жылғы қыркүйекте ақша базасы 2,7%-ға кеңейді, 3753,1 млрд. теңге болды (жыл басынан бері 32,8%-ға кеңейді). Тар ақша базасы, яғни екінші деңгейдегі банктердің Ұлттық Банктегі мерзімді депозиттерін есептемегендегі ақша базасы 3574,9 млрд. теңгеге дейін 1,3%-ға кеңейді.

2014 жылғы қыркүйекте ақша массасы 13466,8 млрд. теңгеге дейін 0,9%-ға өсті (жыл басынан бері 16,1%-ға өсу). Айналыстағы қолма-қол ақшаның көлемі 1369,3 млрд. теңгеге дейін 1,0%-ға төмендеді (жыл басынан бері 9,5%-ға төмендеді), банк жүйесіндегі депозиттер 1,1%-ға өсті және 12097,5 млрд. теңгені құрады (жыл басынан бері – 19,9%-ға өсті). Ақша массасы құрылымындағы депозиттердің үлесі 2014 жылғы қаңтар-қыркүйекте тіркелген айналыстағы қолма-қол ақша көлемінің қысқаруы аясында депозиттер көлемінің өсуі нәтижесінде 2013 жылғы желтоқсандағы 87,0%-дан 2014 жылғы қыркүйекте 89,8%-ға дейін өсті.

Ақша мультипликаторы 2014 жылғы қаңтар-қыркүйекте тіркелген ақша массасының өсу қарқынымен салыстырғанда ақша базасы кеңеюінің үдемелі қарқынының салдарынан 2013 жылғы желтоқсандағы 4,10-нан 2014 жылғы қыркүйектің қорытындысы бойынша 3,59-ға дейін төмендеді.

4. Валюта нарығы

2014 жылғы қыркүйекте теңгенің АҚШ долларына қатысты бағамы 1 АҚШ доллары үшін 181,88 – 182 теңге аралығында өзгерді. Айдың соңында теңгенің биржалық бағамы бір АҚШ доллары үшін 181,90 теңге болды.

2014 жылғы қыркүйекте қосымша сауда-саттықтардағы мәмілелерді қоса алғанда, Қазақстан Қор Биржасындағы биржалық операциялардың көлемі 2014 жылдың алдыңғы айымен салыстырғанда 29,7%-ға төмендеп, 6,2 млрд. АҚШ долларын құрады. Биржадан тыс валюта нарығындағы операциялардың көлемі 0,7 млрд. АҚШ долларына дейін 24,1%-ға ұлғайды.

Жалпы алғанда, ішкі валюта нарығындағы операциялардың көлемі 2014 жылғы маусыммен салыстырғанда 26,3%-ға төмендеп, 6,9 млрд. АҚШ доллары болды.

5. Мемлекеттік бағалы қағаздар нарығы

2014 жылғы қыркүйекте Қаржы министрлігінің мемлекеттік бағалы қағаздарын орналастыру бойынша 10 аукцион өткізілді. Онда 3 жылдық МЕОКАМ (5,1 млрд. теңге), 5 жылдық МЕОКАМ (23,8 млрд. теңге), 9 жылдық МЕУКАМ (1,1 млрд. теңге және 7,9 млрд. теңге), 10 жылдық МЕУКАМ (12,1 млрд. теңге), 13 жылдық МЕУКАМ (12,4 млрд. теңге және 16,3 млрд. теңге), 15 жылдық МЕУКАМ (11,0 млрд. теңге), 25 жылдық МЕУКАМ (40,3 млрд. теңге), 30 жылдық МЕУКАМ (80,1 млрд. теңге) орналастырылды.

Орналастырылған бағалы қағаздар бойынша тиімді кірістілік: 3 жылдық МЕОКАМ бойынша – 5,27%, 5 жылдық МЕОКАМ бойынша – 6,61%, 9 жылдық МЕУКАМ бойынша – 6,20% және 6,38%, 10 жылдық МЕУКАМ бойынша – 7,12%, 13 жылдық МЕУКАМ бойынша – 7,46% және 7,48%, 15 жылдық МЕУКАМ бойынша – 7,68%, 25 жылдық МЕУКАМ бойынша – 8,40%, 30 жылдық МЕУКАМ бойынша – 8,65% болды.

Қаржы министрлігінің айналыстағы бағалы қағаздарының көлемі алдыңғы аймен салыстырғанда 5,0%-ға ұлғая отырып, 2014 жылғы қыркүйектің аяғында 4215,3 млрд. теңге болды.

Қазақстан Ұлттық Банкінің қысқа мерзімді ноттары.

2014 жылғы қыркүйекте Ұлттық Банктің 3 айлық ноттарын орналастыру бойынша 1 аукцион болды (9,9 млрд. теңге). Орналастырылған ноттар бойынша тиімді кірістілік тиісінше 3,27%-ды құрады.

2014 жылғы қыркүйектің аяғында айналыстағы ноттардың көлемі 2014 жылғы тамызбен салыстырғанда 47,6%-ға ұлғайып, 30,8 млрд. теңгені құрады.

6. Банкаралық ақша нарығы

2014 жылғы қыркүйекте орналастырылған банкаралық депозиттердің жалпы көлемі 2014 жылғы тамызбен салыстырғанда 9,6%-ға қысқарып, баламасында 2534,2 млрд. теңге болды.

Теңгемен орналастырылған банкаралық депозиттердің көлемі 48,8%-ға қысқарып, 670,6 млрд. теңге (орналастырылған депозиттердің жалпы көлемінің 26,5%) болды. Бұл ретте теңгемен орналастырылған банкаралық депозиттер бойынша орташа алынған сыйақы мөлшерлемесі 2014 жылғы тамыздағы 2,78%-дан 2014 жылғы қыркүйекте 2,79%-ға дейін өсті.

2014 жылғы қыркүйекте доллармен орналастырылған депозиттердің көлемі 2014 жылғы тамызбен салыстырғанда 21,8%-ға қысқарып, 9,8 млрд. АҚШ долларын (орналастырылған депозиттердің жалпы көлемінің 70,4%-ы) құрады. Доллармен орналастырылған депозиттер бойынша орташа алынған сыйақы мөлшерлемесі 2014 жылғы тамызда 0,06%-дан 2014 жылғы қыркүйекте 0,07%-ға дейін өсті.

Ресей рублімен және еуромен орналастырылған депозиттердің көлемі көп емес – орналастырылған депозиттердің жалпы көлемінің тиісінше 3,0%-ы және 0,1%-ы.

Шетел валютасындағы банкаралық депозиттердің үлесі орналастырылған депозиттердің жалпы көлемінің 2014 жылғы тамыздағы 83,9%-дан 2014 жылғы қыркүйекте 73,5%-ға дейін қысқарды. Шетел валютасымен резидент емес банктерде орналастырылған депозиттердің үлесі орналастырылған банкаралық депозиттердің жалпы көлемінің 2014 жылғы тамыздағы 83,7%-дан 2014 жылғы қыркүйекте 72,7%-ға дейін қысқарды.

Ұлттық Банк банктерден тартқан депозиттердің көлемі 2014 жылғы тамызбен салыстырғанда 2014 жылғы қыркүйекте 55,9%-ға өсіп, 631,0 млрд. теңгені құрады.

7. Депозит нарығы

Депозиттік ұйымдардағы резиденттер депозиттерінің жалпы көлемі 2014 жылғы қыркүйекте 12097,5 млрд. теңгеге дейін 1,1%-ға өсті (жылдың басынан бері 19,9%-ға өсті). Заңды тұлғалардың депозиттері бір айда 7753,2 млрд. теңгеге дейін 2,2%-ға өсті (жылдың басынан бері 25,4%-ға өсті), жеке тұлғалардың депозиттері 4344,3 млрд. теңгеге дейін 0,9%-ға төмендеді (жылдың басынан бері 11,2%-ға өсті).

Ұлттық валютадағы депозиттердің көлемі 2014 жылғы қыркүйекте 6582,4 млрд. теңгеге дейін 0,8%-ға өсті (заңды тұлғалардың депозиттері – 0,9%-ға, жеке тұлғалардың депозиттері – 0,6%-ға өсті), шетел валютасымен – 5515,1 млрд. теңгеге дейін 1,4%-ға өсті (заңды тұлғалардың депозиттері – 4,1%-ға өсті, жеке тұлғалардың депозиттері – 2,0%-ға төмендеді). Теңгемен депозиттердің үлес салмағы бір айда 54,5%-дан 54,4%-ға дейін төмендеді.

8. Кредит нарығы

Банктердің экономиканы кредиттеуінің жалпы көлемі 2014 жылғы қыркүйекте 12228,3 млрд. теңгені құрап, 0,4%-ға көтерілді (жыл басынан бері 8,3%-ға өсті).

Ұлттық валютадағы кредиттердің көлемі 8486,3 млрд. теңгеге дейін 1,7%-ға көтерілді (жыл басынан бері 6,9%-ға өсті), шетел валютасындағы кредит көлемі 3742,0 млрд. теңгеге дейін 2,4%-ға төмендеді (жыл басынан бері 11,5%-ға өсті). Теңгедегі кредиттердің үлес салмағы бір айда 68,5%-дан 69,4%-ға дейін өсті.

Ұзақмерзімді кредиттеу 2014 жылғы қыркүйекте 9937,8 млрд. теңгені құрап, 1,5%-ға өсті, қысқамерзімді кредиттеу 2290,4 млрд. теңгеге дейін 4,0%-ға төмендеді. Ұзақмерзімді кредиттердің үлес салмағы бір айда 80,4%-дан 81,3%-ға дейін ұлғайды.

Заңды тұлғаларға берілген кредиттердің көлемі 2014 жылғы қыркүйекте 8203,7 млрд. теңгеге дейін 0,4%-ға көтерілді, жеке тұлғаларға кредиттер 4024,6 млрд. теңгеге дейін 0,3%-ға ұлғайды. Жеке тұлғаларға берілген кредиттердің үлес салмағы алдыңғы айдағы деңгейін (32,9%) сақтап қалды.

Шағын кәсіпкерлік субъектілерін кредиттеу 2014 жылғы қыркүйекте 1699,7 млрд. теңгеге дейін 4,7%-ға көтерілді (жыл басынан бері өсім 32,4%), бұл экономикаға берілген кредиттердің жалпы көлемінің 13,9%-ын құрайды.

Салалар бойынша банктердің экономикаға берілген кредиттерінің ең қомақты сомасы сауда (жалпы көлемдегі үлесі – 19,6%), құрылыс (10,9%), өнеркәсіп (10,9%), ауыл шаруашылығы (3,6%) және көлік (3,4%) сияқты салаларға тиесілі.

2014 жылғы қыркүйекте банктік емес заңды тұлғаларға ұлттық валютада берілген кредиттер бойынша орташа алынған сыйақы мөлшерлемесі 10,1% (2014 жылғы тамызда – 10,2%), жеке тұлғаларға – 18,5% (18,8%) болды.